

Uunga siunnersuut: Nunatsinni erngup nukinga atorlugu pilersuinissamut kiisalu avammut niueruteqarnissamut periarfissat unammilligassallu erngup nukinganik nukissiuuteqarfiusuni piukkunnaatilinnilu Naalakkersuisut nalunaarusiornissamut peqquneqarnissaannik Inatsisartut aalajangiiffigisassaattut siunnersuut.

Nalunaarusiami erngup nukinganik nukissiorfinnik pilersitsinissamut aningaasalersuinissaq kiisalu tamatumunnga periarfissat ilaatinneqassapput.

Nalunaarusiaq kingusinnerpaamik inatsisartunut UKA2017-imi saqqummiunneqassaaq.

(Inatsisartunut ilaasortaq Anthon Frederiksen, Partii Naleraq)

Siunnersuutip aappassaaneerneqarneranut

Sanaartornermut ataatsimiititaliap

ISUMALIUTISSISSIONAA

Suliarineqarnerani Ataatsimiititaliaq kingullermik ukuninnga inuttaqarpoq:

Inatsisartunut ilaasortaq Anders Olsen, Siumut, siul.

Inatsisartunut ilaasortaq Kalistat Lund, Inuit Ataqatigiit, siul. tull.

Inatsisartunut ilaasortaq Justus Hansen, Demokraatit

Inatsisartunut ilaasortaq Jens-Erik Kirkegaard, Siumut

Inatsisartunut ilaasortaq Ane Hansen, Inuit Ataqatigiit

Ull. 9. maj 2016 siullermeerereernermi Ataatsimiititaliap siunnersuut misissorpaq.

Siunnersuutip imaa siunertaalu

Siunnersuutip kingunerissavaa, Kalaallit Nunaanni imermik nukissiornermik periarfissat atorneqartut atorneqanngitsullu atorneqarnissaannut kiisalu avammut niuerutigineranut atatillugu Naalakkersuisut nassuaasioqquneqarnissaat. Nassuaammi aamma allaaserineqassapput erngup nukinganik innaallagissiorfinnik pilersitsinermi tassungalu atatillugu attaveqaatinut aningaasalersuinissamut pisariaqartitsineq periarfissallu. UKA 2017-imi kingusinnerpaamik nassuaat Inatsisartunut agguaanneqassaaq.

Siunnersuutip Inatsisartuni siullermeererneqarnera

Partiinit tamanit, aamma Naaja Nathanielsenimit (Attaviitsumit) kiisalu Naalakkersuisunit siunnersuut akuerisassatut inassutigineqarpoq.

Siunnersuutip Ataatsimiititaliamit suliarineqarnera

Ataatsimiititaliap maluginiarpaq, siunnersuut Inatsisartunit isumaqatigiittunit Naalakkersuinillu akuerisassatut inassutaasoq, siunnersummilu (taamaallaat) pineqartoq tassaasoq nassuaasiornissaq. Tamanna tunngavigalugu annertunerusumik oqaaseqaateqarnissamut Ataatsimiititaliaq pissutissaqanngilaq.

Siunnersuutip aningasatigut kingunissai

Siunnersuutip tunngavilersuutitaani aalajangiiffigisassatut siunnersuutip piviusungornerani aningasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq.

Siunnersuuteqartup missingerpaa, aningasatigut kingunissai tassaassasut AC tunngavigalugu sulisitap ukiup ataatsip marlullu akornanni akissarsiai (ukiumut 500.000 kr.). Taamatut naliliineq assortussallugu Naalakkersuisut pissutissaqarsimanngillat, taamaattumillu Ataatsimiititaliaq allatut isummernissamut aamma pissutissaqanngilaq. Tassunga atatillugu Ataatsimiititaliap paasivaa, siunnersummi nassuaat taaneqartoq nukissiornermi immikkoortunut pilersaarutinut maanna naalakkersuisoqarfimmi sularineqartunut ilanngunneqarsinnaanera naatsorsuutigineqartoq – kiisalu akissaajaatit taamaalillutik sappingisaq malillugu maanna missingiutaareersunit matussuserneqarsinnaassasut naatsorsuutigineqartoq.

Ataatsimiititaliap inassutaa

Ataatsimiititaliap isumaqatigiittup siunnersuut akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Anders Olsen

Siulittaasoq

Kalistat Lund

Siulittaasup tullia

Justus Hansen

Jens-Erik Kirkegaard

Ane Hansen